

Futuro centro di artesanía y arte

Minister Michelle Hooyboer-Winklaar contento cu restauracion di edificio na Zoutmanstraat ta bay cuminsa



ORANJESTAD (AAN): Den un futuro cercano nos artista y artesanonan lo tin un “cas”, un edificio unda cu lo por bende piesanan di artesanía y arte cu ta wordo traha na Aruba y ta carga e “stempel” oficial. Tambe lo organisa tayernan special eyden. Minister Michel'e Hooyboer-Winklaar a scoge e edificio modesto, pero historicamente hopi importante pa esaki y ta orguyoso di por anuncia cu oficialmente e restauracion di e edificio aki a cuminsa.

Como e mandatario encarga cu e cartera di cultura, e preservacion di nos monumentonan pa medio di Monumentenbureau tambe ta resorta bao di Hooyboer-Winklaar, kende a expresa cu tabata un “fit natural” pa trece hunto e trabao di nos artesano y artistanan den un edificio historico. “Esaki ta un proyecto cu un impacto hopi grandi,” Minister Hooyboer-Winklaar a bisa.

E edificio di dos piso na Zoutmanstraat a fungi, den añanan mas recien, entre otro como oficina di BUVO,

FDEC, Museo Arkeologico y Monumentenbureau, pero loke hopi hende kisas no ta corda ta cu esaki tabata un di e cuater bestuurskantoor nan cu Aruba a conoce.

Segun Yvonne Webb-Kock, director di Monumentenbureau, a splica cu e restauracion tin su retonan; e monumento ta mas di 100 aña bieu y traha di koraalsteen (piedra di coral), e dak tin problema y mester trece e trapi di palo bek. Sra. Webb-Kock a pidi e contratista Van den Broek tambe pa tene cuenta cu ta wordo bisa cu den e edificio tin un boter scondi y ningun hende no sa unda e ta. Esaki naturalmente no ta haci e trabao di e contratista mas facil pasobra sigur kier pa e boter aki wordo conserva si e wordo haya. Sra. Webb-Kock a añadi cu si e boter ta tras di e plachi di brons cu tin na e edificio e no lo wordo haya y e ta keda safe, pasobra esey no lo wordo mishi cune durante e restauracion.

Minister Hooyboer-Winklaar a subraya cu e edificio di Zoutmanstraat ta un monumento hopi special. E ta parti di e curason di gobernacion, loke Minister President Mike Eman ta yama e “binnenhof”, unda cu diferente edificio y servicio importante ta ubica, manera Bestuurskantor, Parlamento,

Oficina di Gobernador, Fort Zoutman/Willem III Toren, cas Eloy Arends (stadhuis) y Algemene Rekenkamer, entre otro.

Cu establecimiento di e centro di arte y artesanía den e monumento, Minister Hooyboer-Winklaar kier duna loke ta di nos, local ta “Made on Aruba” y e personanan creativo cu ta presenta esaki, un presencia central. Asina e artesanonan cu lo ricibi e stempel oficial lo tin un caminda central unda nan por presenta y bende nan piesanan y hasta duna tayer. E proceso pa otorga e stempel lo wordo completa den e proximo lunanan, segun Minister Hooyboer-Winklaar.

Den cualkier ciudad rond mundo ta destaca e mensahe di e rikesa di e pais pa loke ta contenido, arte visual, historia, arte den espacio nan publico, etc. y esaki lo destaca na Aruba sigur den e monumento na Zoutmanstraat cu su bunita arkitektura clasico, combina cu arte y artesanía local obtenibel paden. Sigur un placer pa tanto nos turistanan y nos hendenan local bishita y brinda apoyo na nos artesanonan kende ta uza nan talento y creatividad pa presenta piesanan bunita y original.

Cu esaki tambe gobierno di Aruba, particularmente Minister di Asuntonan



Economico, Asuntonan Social y Cultura Michelle Hooyboer-Winklaar no solamente ta motiva e artesanonan pa saca satisfaccion di por haci di nan arte y hobby nan trabao, pero tambe un biaha mas ta dune un empuhe y encurasha negoshinan chikito y micro pa crece, expande y desaroya.

E restauracion di e monumento di Zoutmanstraat ta costa Afl. 1,050,000 segun Minister di Infraestructura Benny Sevinger. Croës ArchitectenStudio y contratista Van den Broek ta encarga cu e trabao, cual ta wordo supervisa pa Monumentenbureau.